

道光遵義府志

遵義府志卷十七

物產

志載方物非譜羣芳凡從同常見無關考索者固可  
無庸備數也前志及州縣各志略列通有物名而又  
毫不註釋徵士宜者何貴焉若他輿地故書又類必  
備名名必煩引亦無濫爲病矣遵義昔蜀今黔庶類  
馮生大要同蜀爲夥茲就耳目所及前籍可稽分別  
彙次有能詳者略以已意綴之非詡士會之富要見  
茂對時育品物桐生飭化阜通自安樂利亦使談播土者  
不得尙稱爲猿狖所宅云爾

穀類

五穀

揚雄蜀都賦五穀馮戎左思蜀都賦黍稷油

油稷稻漠漠常璩巴志土植五穀又土風詩川崖惟

平其稼多黍野惟阜邱彼稷多有按五屬種稻高田

下濕各因土宜秬稷不下二三十名皆清明前後種

八月收麥供餅餌者爲小麥供飯者爲大麥又有一

種名老麥供製酒亦作飯燕麥俗呼香麥又呼油麥

作餅人珍食之竝八月種四月收惟香麥種收稍遲

稷俗呼高粱十九釀酒貧者亦作餅飯清明前種八

月收黍俗呼黍子間有種者三月種九月收禾俗呼

小米山農多種之以作飯三月種八月收大豆俗呼黃豆清明後種八月收赤黑豆名鍾子豆種收同竝以磨豆腐作豉及糞粉蠶豆俗呼胡豆九月種四月收豌豆白者名白豌豆者名麻豌豆種收同竝以利飯作粉纜綠豆清明後種八月收以煮粥作纜供燕食米豆有白者斑者有一種小而斑者爲貓豆又名爬山豆種收同竝以作飯胡麻名脂麻以搗茶點糖餅榨油一種火麻莖皮可績一種似蘇者曰蘇麻子竝中搗茶竝三月種八月收菽俗呼蕎麥又名菽子歲兩種春菽二月種四月收秋菽七月種九月收以作

餅餌或搏粉和粢作飯稗三月種八月收更有水稗種水田與稻同其長大似高粱俱分黏稞竝以作餅飯又有草子種收同水地山地俱可種玉蜀黍俗呼包谷色紅白純者黏雜者稞清明前後種七八月收歲視此爲豐歉此豐稻不大熟亦無損價視米賤而耐食食之又省便富人所唾棄農家之性命也其糜作糖視米製更甘脆

天星米

金川瑣記

天星米米如黍粒可作糧食葉

經霜紅如老少年秋深滿山紅葉亦一大觀按土人以米炒成花和糖搏作餅切片以食名天星餅

蔬類

白菜青菜萹蒿苣蘿蔔苦蕒葱韭薤蒜葫蘆芫荽芹  
木耳人參菜

陳志皆州縣產

白芥 羣芳譜白芥一名蜀芥來自戎中而盛於蜀  
八九月種至春深莖高二三尺葉如花芥葉青白色  
爲茹盛美莖易起而中空三月開黃花結角子如梁  
米黃白色又一種莖大而中實者子亦大白芥子堪  
入藥味極辛美

蔓菁 嘉話錄三蜀之人呼蔓菁爲諸葛菜

菠菜 詢芻錄南人呼菠菜北人呼赤根菜蘇軾詩

北方苦寒今未已雪底菠薐如鐵甲豈知吾蜀富冬  
蔬霜葉露芽寒更茁

胡葱 羣芳譜生蜀郡山谷狀似大蒜而小形圓皮  
赤葉似葱根似蒜味似薤不甚臭八月種五月收一  
名蒜葱又名回回葱莖葉粗硬

山韭 爾雅藿山韭本草山韭一名鐵形性與家韭  
相類但根白葉如燈心苗山中往往有之按土人呼  
爲野葱以和蔬甚香美貧兒盃易於市亦微利也  
薤菜 南方草木狀野葛有大毒以薤菜汁瀉其苗  
當時萎死世傳魏武噉野葛至一尺云先食此菜

巢菜

本草一名薇一名野豌豆一名大巢菜集解

蜀人謂之巢菜蔓生莖葉氣味皆似豌豆其蕾作蔬  
入羹皆宜詩采薇禮豕豕以薇皆此物詩疏以爲迷  
蕨鄭氏通志以爲金櫻芽皆誤蘇軾元修菜詩引菜  
之美者有吾鄉之巢故人巢元修嗜之余亦嗜之因  
謂之元修菜陸游巢菜詩序蜀蔬有兩巢大巢豌豆  
之不實者小巢生稻畦中一名翹搖一名野蠶豆明  
四川志巢菜州縣俱出葉似槐而小其子如小豆夏  
時種以糞田其苗可食

山藥

羣芳譜原名薯蕷處處有之蜀道尤良



瓜瓠

揚雄蜀都賦瓜瓠饒多按南瓜冬瓜絲瓜苦

瓜黃瓜無家不種西瓜仁懷種之其南瓜早實者名

白瓜瓠俗名金瓜其長者名大黃瓜

甜瓜

蜀都賦瓜疇芋區廣志蜀地温良瓜冬熟有

春日瓜細小小瓣宜藏正月種三月熟有秋泉瓜秋

種十月熟形如羊角色蒼黑

芋

蓋部方物贊芋種不一鷓芋則貴民儲於田可

用終歲王維詩巴人訟芋田羣芳譜芋在在皆有之

蜀漢爲最東坡雜記蜀中人接花果皆用芋膠合其

罇

茄子 元和郡縣志涿州開元貢茄子

薑 呂氏春秋和之美者蜀郡楊樸之薑蜀都賦甘  
蔗辛薑陽薑陰敷

木薑 禮記內則三牲用藪注藪煎菜萁也爾雅謂

之櫛疏賀氏云今蜀郡作之九月九日取菜萁折其  
枝連其實廣長四五寸一升實可和十升膏名爲藪  
也蓋部方物略記艾子大抵菜萁類也實正綠味辛  
蜀人每進羹臠以一二粒投之少選香滿盂盞或曰  
作爲膏尤良按揚雄蜀都賦當作藪藪艾同字贊曰  
綠實若萁味辛香苾投粒羹臠椒桂之匹本草綱目

李時珍曰食茱萸一名藪即欖子蜀人呼爲艾子按揚雄蜀都賦稱木艾今郡人通呼木薑其花味尤香美

椒

蜀都賦或蕃丹椒本草綱目李時珍曰蜀椒子

光黑如人之瞳人故謂之椒目羣芳譜椒一名花椒川椒肉厚皮皺粒小子黑外紅裏白入藥以此爲良他椒不及明四川志各州縣俱出椒茂已編結實色青者曰青椒其紅者曰花椒用入藥陳志州縣皆產蔓椒本草蔓椒一名豕椒一名狗椒野生林箐間枝軟如蔓子葉皆似椒山人亦食按俗呼狗矢椒少

食旨

番椒 草花譜番椒叢生白花子儼似秃筆頭味辣  
色甚紅可觀子種按郡人通呼海椒亦稱辣角園蔬  
要品每味不離鹽酒漬之可食終歲其形狀有數種  
長細角似者名牛角海椒細如小筆頭叢結尖仰者  
名纂椒二種尤辣一種扁圓形色或紅或黃味不甚  
辣名柿椒中盆玩

甘藷 南方草木狀甘藷蓋薯蕷之類或曰芋之類  
根葉不如芋皮紫而肉白蒸煑可食異物志甘藷南  
方民家以二月種十月收之其根似芋亦有巨魁大

者如鵝卵小者如鷄鴨卵剝去紫皮肌肉正白如肪  
南人當米穀果食炙皆香美初時甚甜經久得風稍  
淡荒年雜詠有一種野生者俗名茅狗薯有製以亂  
山藥者饑年人掘取作鮭田居蠶室錄俗呼韶薯聲  
之轉有紅白二種山農廣種者收多至三四十石卽  
煮以當糧亦可碎切和米作飯一種充園蔬者名雲  
板薯又名腳板薯草墩薯皆以形名大者徑一二尺  
肌白甚蔓間結子拾而窖於火畔俟春種之  
蒟蒻常璩巴志園有芳蒟蜀都賦其圃則有蒟蒻  
劉洲林注蒟草也其根名蒟頭大者如斗其肌正白

可以灰汁煮則凝成可以苦酒漬食之蜀人珍焉本草綱目一名蕩頭一名鬼芋出蜀中呼爲鬼頭馬志言其苗似半夏楊慎丹鉛錄言蒟醬卽此者皆誤茂已編秋冬間采根拭去粗皮切細磨研成漿煮之用大匕和不合成餅俟熟用石灰或鼓灰水點之待凝畫成塊味甘滑乾隆丙子丁丑家園所生紅莖高二三尺色如火皆劍戟形後緬甸用兵滇黔不寧乃知此兵兆也按其芽俗名鬼鼻以爲種五六月朝露時以竹竿拍其葉露所滴卽旁生磨煮時忌多諸石則汁凝煮之不化或成水

大頭菜 桐梓志曰產按雲南志稱樹頭菜州縣并

產

蕨 爾雅翼蕨紫色而肥野人今歲焚山則來歲蕨

菜繁生其舊生葉之處蕨葉老硬敷披人誌之謂之

蕨基戊巳編蕨有二種一曰甜蕨採食軟滑有味俗

謂蕨蔓長者尺餘末散如雞爪形細葉鱗次俗謂蕨

基根如竹節皮黑白而有筋掘其根洗淨入木槽搗

爛之則曰蕨凝以其凝置缸中和水反覆淘杵取汁

以椶皮瀘去滓別盛之經宿凝淀如膏則曰蕨粉味

甘美乾隆庚寅戊子兩丁歉歲流民四集長林曠野

掘取一空賴活甚衆一種苦蕨形相同但味苦亦可食又有猫蕨初生時有白膜裏頭莖如蒜蔓青綠色不可食荒年雜詠在水邊生者名豈蕨按成蕨粉後搏爲餅蒸食曰蕨巴以粉灑釜中微火起之曰蕨線待乾定煮之如水引亦可煎食

菌揚雄蜀都賦瑕英菌芝蜀語地芝曰菌音郡菌之大者名鬥雞蕨生桑樹上者名樹雞生櫟松林中有黃白赤綠四種可食其面上如石灰者殺人用黃土和水漿食之可治又音捲夏月天雨生山中石骨上土人名地菌皮可食田居蠶室錄夏菌五六月秋



菌八九月雨後生種類至夥俗隨形呼其大腳菰青  
糖菰刷帚松毛黃絲諸種無毒一種爪其蓋卽出白  
汁名茶菌又名羊奶菌味尤香美又一種名凍菌形  
半圓肉之軟嫩勝楊妃乳生樹頭上四時有之不能  
乾蓄至一種紅蓋者多生榭林曰青桐菌又曰一羣  
羊食者多中毒凡菌有毒者經炊烟薰乾卽無

雞墖

廣菌譜雞墖按通雅作雞墖雲南志謂之雞

墖雞以形言墖者飛而斂足之貌說本楊慎或作蟻  
墖以其產處下皆蟻穴貴州志云下有蟻若蜂房狀  
又名蟻奪滇黔紀遊雞墖黔中亦產但不如滇之蒙

化者佳有紫白二種白者恆殺人初秋生蔓草中始  
奮如粒既如葢漸則紛披如雞羽故曰雞以其從土  
中出故曰縱雲南志六七月大雨後生沙土中或松  
間林下鮮者香味甚美土人鹹而腊之經年可食若  
熬液爲油以代醬豉其味香美田居蠶室錄生無常  
地常時色香味俱舊中第一惟僅生一朶者不可遽  
食有土人得一朶高且大攜市之及返經採處復一  
朶如前疑而掘其下一巨蛇正張口噓氣急返告市  
者已登盤將入口矣賴以免其毒

蒟醬

常璩蜀志

江陽郡有蒟又巴志蔓有辛蒟前

漢南越傳使唐蒙風曉南越食蒙菹醬蒙問所從來  
曰道西北牂柯江揚雄蜀都賦椒離菹醬劉淵林蜀  
都賦注菹醬緣樹而生其子如桑椹熟時正青長二  
三寸以蜜藏而食之辛香溫調五臟蓋部方物贊蔓  
附木生實若椹纍或曰浮留南人謂之和以爲醬五  
味皆宜

苦筍

黃庭堅和春菜詩公如端爲苦筍歸明日春

衫誠可脫自跋云余生長江南里人喜食苦筍試取  
嘗之氣苦不堪於鼻味苦不可於口及來黔黔人  
冬苦筍萌於土中才一寸許味如蜜蔗初春則不食

惟楚道人食苦筍四十餘日出土寸餘猶甘苦相半  
水竹筍 筍譜水竹筍出黔南管內或巖下潭水中  
生隨水深淺以成節若深一丈則筍出水面爲一節  
蠻蛋採取以爲食

淡筍方筍平筍

綏陽志縣產

土瓜 鋤經堂集土瓜柔蔓生山野間其根俗呼土  
蛋童子常掘食之歲饑可助糧

果類

杏棗花紅石榴白果胡桃柿蔗桃李櫻桃葡萄 陳  
志皆州縣果產揚雄蜀都賦黃甘諸柘柿桃李枇

杷杜櫨栗榛棠梨離支雜以槭橙被以櫻梅樹以木  
蘭扶林禽左思蜀都賦橙柿棊棊朱櫻春熟榭桃函  
列梅李羅生葡萄亂漬若榴競裂

楊梅

北戶錄楊梅播州有白色者甜而絕美周必

大次韻楊梅詩越人一枝古所重蜀無他楊譜則同

通志楊梅出綏陽仁懷二縣按各屬並多

枇杷

清異錄枇杷襄漢吳蜀湖南北皆有宋祁枇

杷詩有果產西蜀作花凌早寒樹繁碧玉葉柯疊黃  
金丸上都不可寄味咀獨長歎劉淵林蜀都賦注枇

杷冬華黃實本出蜀

林檎

蜀都賦其園則有林檎枇杷尚書故實王內

史書帖中有與蜀郡守書求櫻桃來禽曰結藤子

餘甘子

蓋部方物略記樹大葉細似槐實若李而

小咀之前澁後歆歆有味故號爲餘甘核有稜或六

或七解疏黃毒卽本草所謂菴摩勒者贊曰黃葩翠

葉圓實而澤咀久還甘或號菴勒

梨 蜀都賦紫梨津潤按桐梓婁化里泥馬廟有樹

園二丈許土人名水梨子

荔支

常璩蜀志江陽郡有荔支又巴志果實之珍

者樹有荔支蔡襄荔支譜洛陽取於嶺南長安來於

巴蜀又云蜀所出早熟而肉薄味甘酸鄧慶宗荔枝譜蜀中荔枝瀘敘之品爲上鄭谷荔枝樹詩二京曾見畫圖中數本芳菲色不同孤櫂今來巴徼外一枝煙雨思無窮夜郎城近含香瘴杜宇巢低起暝風腸斷渝瀘霜霞薄不教葉似灞陵紅授荔枝仁懷桐梓竝產仁懷志言相傳茲土有荔枝惟舊縣有二株挺生味酢非其實也

橘 更記貨殖傳蜀漢江陵千樹橘其人與千戶侯等蜀都賦戶有橘柚之園

柑 羣芳譜柑江南及嶺南爲盛川蜀次之益部方

物贊碧葉春葩厥包之珍丹衷既披香液始津

香楸 通志出仁懷者皮粗而大香於他郡

佛手柑 通志亦出仁懷

蜜羅柑 仁懷志三歲一熟芳馨可遺

無花果 桐梓志邑產按各屬皆有

落花生 正安志州產

羊桃 草木蟲魚疏鄭氏曰藤生子赤狀如鼠糞

故亦名鼠矢兒童食之蜀本圖經子細如棗核苗長

弱蔓生不能爲樹今呼爲細子根似牡丹按羊桃子

可食其藤及根葉性並黏膩郡人造紙者採而搗之



以和構竹筒紙始成呼爲滑藥

千葉桃 棠陰札記府學署千葉桃十餘株花時坐

錦幄中俯視城廂盡在霞際實不甚大絕甘脆

金橘 華陽國志江陽郡有給橙魏王花木志蜀有

給客橙似橘而非若柚而香亦名盧橘

菱蓮 揚雄蜀都賦草葉蓮藕茱華菱根石湖詩自

注蜀中無菱至蜀州西湖始見之按郡城西天池菱

藕最盛環山二十里爲郡中大觀池畔居民秋後時

採蓮子菱角入市賣之惟水深藕不易得城北十里

菱角堰有異蓮五六年一發葉開花餘時根葉俱未

見

沙棠

呂氏春秋果之美者沙棠之實救荒本草白

棠子樹

一名沙棠梨兒一名羊孀子樹又名剪子果

枝幹似棠梨樹枝而細其色微白葉似棠葉而窄小

色亦頗白又似女兒茶葉卻大而背白結子如豌豆

大味酸甜

拐棗

四川志木密俗名拐棗詩小雅南山有枸陸

璣疏枸樹一名狗骨今官園種之謂之木密古語曰

枳椇來巢言其味甘故飛鳥慕而巢之本從南方來

能令酒味薄若以爲屋柱則一屋之酒皆薄古今注

枳椇子一名樹蜜一名木錫本草枳椇一名木楨椹  
木高三四丈葉圓大如桑柘夏月開花枝頭結實如  
雞爪形長寸許紐曲開作兩三岐儼若雞之足距嫩  
時青色經霜乃黃味甘如蜜每開岐盡處結一二小  
子狀如蔓荊子內有扁核赤色如酸棗仁形救荒本  
草拐棗葉似楮葉無花又面多紋脉邊有細鋸齒開  
淡黃花結實狀似生薑拐又而細短深褐色故名味  
甜田居蠶室錄拐棗子鴨食之須臾即死此不可解  
者

栗

蜀都賦桴栗罅發文同詩蒼蓬蒺藜大紫殼楨

榔軟蜀都名果中推之爲上選戊巳編郡產栗四種  
一毛栗又名板栗樹高大者數丈白皮長葉有稜刺  
葉大如巨杯八月熟木理堅緻修屋造器貴之一猴  
栗大者樹連抱皮淡紅色葉厚長三寸許葉大於毛  
栗亦八月熟木堅實厚重多以爲棺毛栗殼赤肉黃  
猴栗殼灰肉白味亦不同一槲栗樹卽槲櫨其大連  
抱細葉光滑四五月開細白花結細葉攢攢亦有刺  
九月熟風動子落響如撒沙子大如大豆黑殼白粒  
木性直而緻斧斲之直裂到顛材中棟梁一狗爪栗  
小樹不高葉攢結如狗爪形亦有刺粒如豌豆味同

毛栗乾隆庚寅作饑民詩尋山狗栗盡入室雞糧無

謂此

紅子

四川志名救軍糧云小木本實殊紅色纍纍

如珊瑚味甘可食昔有軍糧不足以此充食故名仁

懷志彌岡被野紅碧可把花幹與天竺花相似古之

青精飴聞用天竺子汁以漬米食之或此種未可定

戊巳編紅子木類山谷道旁多有之高二三尺叢生

拳密根最堅深枝間刺如錐二三月開細白花結子

圓扁有如大豆者有如細豆者大者味極甘細者稍

苦澀子紅如火亦有黃色者八九月熟若至冬經霜

雪其味尤佳嘗有句云黃茅傲雪稜偏利紅子經霜  
味更甜按今貧家及其熟時爭摘之磨以蒸餅作糧  
惟久食則難便道光一二年郡大歉民多賴以飽語  
云嘉慶接道光紅子當正糧

刺梨

滇黔紀遊

刺梨野生夏花秋實幹與果多芒

刺味甘酸食之消悶煎汁爲膏色同楂梨四封皆產  
移之他境則不生每冬月苗女子採入市貨人得江  
浙楚豫客買之苗女喜曰利市謂得佳客交易也本  
省人爲之買則倍其價江南人或物色之則舉筐以  
贈曰愛莫離愛莫離者華言與你有宿緣也或有調

戲之則大怒曰落勿渾落勿渾者華言沒廉恥也通志幹如蒺藜花如茶蘼實如小石榴有刺味酸取其汁入蜜熬之黔屬俱有越境卽無戊巳編紅子刺梨二物山原之間婦媪未來午茶不繼則耕牧之糧也途左道旁販夫腸吼行子口乾則中路之糧也黔中當乾隆己丑庚寅大歉饑民滿山塞野以此全活者多田居蠶室錄考之本草綱目金櫻子一名刺梨子一名山石榴一名山頭雞子蘇頌云叢生郊野中大類薔薇有刺四月開小白花夏秋結實亦有刺黃赤色形似小石榴按此則金櫻正是今刺梨金櫻當作

金罍與石槽雞頭皆以形象立名白居易有山石榴  
詩是詠蜀產滇黔紀遊及貴州通志竝云黔屬始有  
他境不生余嘗在湖北麗陽驛南五里許一山寺側  
見有數株與黔產無稍異南遊滇中亦到處有此可  
見舊說不盡然也古方有金櫻酒今黔人採刺梨蒸  
之曝乾囊盛浸之酒益名刺梨酒味甚佳是古製也  
今藥肆金櫻非本草所名反以刺梨爲別一物謬矣

貨類

錦  
曹著蜀錦譜茶馬司錦院織錦名色南平軍真  
紅大被褥真紅雙窠錦阜大被褥青大被褥



絹

元豐九域志南平軍貢絹一十四匹

雨氊

元史世祖紀至元十八年楊漢英進雨氊

苗錦

峒溪織志苗錦大似苧布巾幌尤佳其婦女

衣緣領

袖皆綴雜組藻彩雲霞悉非近致謂之花練

土俗珍之

花綾

正安志花綾雜以苧織染色不鮮

鹿皮

陳志州縣貨產

布

元和郡縣志南州開元貢斑布溱州開元貢楮

皮布

紵布明統志斑布廢溱州出通志布土人所織

甚粗按郡人惟遵義東鄉多以織布爲業蓋其棉花

由湖南常德府販買舟載至省溪江口起岸令負者  
渡桶口由間道至鄭家場火燒舟列肆坐賣織家買  
之以易紡線紡家持線與之易一兩花紡成可多得  
二錢貴時可三錢故紡織互資成業他鄉紡者僅爲  
線供縫紉之用業織則線無所出業紡則棉不能繼  
非婦女有巧拙之殊以場市無相資之便也其所織  
寬者極三百二十筵狹者極二百五十筵寬者名大  
土布狹名土布又名小布醬布扣布近老蒲場亦有  
花行左右僅織大布賈人西走蜀之重慶瀘敘南走  
威寧平遠極於金川所販皆東北鄉所織也

銅

揚雄蜀都賦榻林銅陵按綬陽瑪瑙山產銅

鐵

通志鐵出府屬

鉛

通志白鉛出小紅關等處陳志鉛郡貨產

丹砂

新唐志溱州貢丹砂明統志丹砂廢溱州出

蜀都賦

丹砂絕熾出其坂仁懷志采砂甚難田震曰

追一線之蚓蛇探重淵之幽闕壑高支以造天脂親

齋以覓地悵曉夕之莫知置死生於非意

雄黃

明統志雄黃廢夜郎縣出

朴硝

蜀都賦碧砮芒硝本草色青白者佳出益州

山谷

麻 陳志州縣貨產 戊巳編園麻有二種一曰桃麻

一曰火麻桃麻最良種者多亦分二種有坐兜麻叢生稠結莖大而皮薄其子種生所謂傳子不傳根者也有竄根麻根次第散莖小而皮厚其子不生所謂傳根不傳子者也二者竄根良每年皆兩刈夏則五月秋則八月刈時取其幹刮去粗皮暴乾取皮績爲縷用稗草灰水煮經宿搗洗之愈洗愈潔火麻則每年種子幹高皮薄性硬色黃煉不熟洗不潔女工罕用種者爲少又有生山谷者曰山麻形與桃麻同

蠻姑苗婦夏秋採取織帶編裙類用之 陳志麻州縣

貨產

棉花

陳志州縣貨產通鑑梁武帝木棉阜帳史炤

釋文木棉江南多有之春二三月下種生黃花結實  
熟其皮四中縱出如綿土人以竹爲小弓牽弦以彈  
綿卷爲筒就車紡之自然抽緒如縲絲狀按郡不宜  
棉間有種者始生至結果繁茂與中州同惟果多不  
裂所得不敷工種非土地不宜以南方多雨故也

漆

陳志郡產仁懷志縣有漆園費廣文大有自費

州移此田居蠶室錄自生者名大木漆隨長隨割無  
已時其汁厚而澤栽者名小木漆割五六年卽自枯

其品價稍下山野間地竝可多種家有百株不勞而獲利可埒十畝田一種野漆不可割亦不可薪誤燒之中其煙卽四肢腫潰

靛明統志靛府縣俱有通志同周霖種靛說一畝之田獲穀一石者以靛當之當二倍以償其不悉種者費人工也陳志州縣貨產

紙通志綿紙出綏陽者爲佳陳志紙州縣同出田居蠶室錄遵義之紙以構皮製者曰皮紙以竹製者曰竹紙皆宜書以竹雜草爲者曰草紙以供冥鏹粗用皮紙出遵義者以上溪場爲上出綏陽者以黃泥

江爲上白膩堅綿更勝上溪極佳者販入蜀中次者  
賣之本郡亦名小底溝紙亦名大槽紙皆以製處名  
竹紙惟綏陽專製其上者曰厚水紙料專用水竹粉  
白細膩極佳者勝上皮紙草紙隨地可製然亦分佳  
惡以綏陽茅丫製者爲上曰茅丫紙造紙者用一種  
料名滑藥分三種一卽羊桃俗呼羊桃梗一其樹大  
一圍葉尖背有白毛俗名三條筋一其莖如指大結  
黑子大如小豆葉似桑角似罌粟名大滑藥鄉人自  
種春種秋生凡造紙用三條筋紙易用羊桃梗則  
久逾佳大滑葉更在二種之上

白蠟

元和郡縣志播州元和貢蠟二十斤溱州元

和貢蠟四十斤珍州開元貢蠟蜀語白蠟蟲生冬青

樹枝上殼大如圓眼半核殼雨節摘下殼內細蟲如

蟻至立夏節生足能行用桐葉包繫冬青樹枝上其

殼底蟲能作白蠟走向葉背上住其殼口蟲仍爲蟲

種走向葉面上住如入定狀七月後葉背上者脫皮

走聚住枝上身生白衣漸厚卽白蠟也至處暑節採

下煎爲蠟葉面上者蛻皮走散住枝上漸漸長大初

如蟻如蝨漸如粟如米至冬如豌豆如大豆至明年

穀雨所謂大如圓眼半核者殼上有蜜一點至穀雨



蜜乾可摘此卽蟲種也

黃蠟 元和郡縣志秦州開元貢黃蠟陳志州縣貨

產

桐油 陳志州縣貨產戊巳編油桐樹郡無處不有

二三月盛花花蕾時必有凍風冷雨俗謂之凍花天所謂二十四天桐子花也十月子熟去殼取米暴乾碾末蒸熟用笊箍櫻皮包之如鼓樣榨取油燈燭皆資之榨油之法各異以包置榨間上下夾木板以木槓撞槩取油曰撞榨置大木於榨頂用巨繩紮紐曰絞榨榨前懸大木飛撞聲如霹靂山鳴谷應曰千斤

榨又有用二木空中置二木板中夾油包左右用槩木撞撞取雖婦女皆力能之其油最清曰小榨油田居蠶室錄若農家歲收桐子五石可獲錢十二千土家僅收二石亦足供讀書五燈也

菜油

陳志州縣竝出

烏柏油

田居蠶室錄

柏俗呼卷子樹聲之訛人家

種十株歲收子作膏足供祭祀之燭

馬鞍油

田居蠶室錄馬鞍樹開花結子殼形如互

兩錢子在錢內熟時紅極取子榨油可作燭

蜜

華陽國志平夷縣山出茶蜜明統志州縣俱有

蜀都賦蜜房郁毓被其阜陳志州縣貨產

茶 方言蜀西南人謂茶曰葭揚雄蜀都賦蔓茗熒  
郁常璩巴志園有香茗茶經茶之出黔中生恩州播  
州費州夷州茶譜涪州出三般茶賓化最上製於早  
春太平寰宇記茶生諳州山谷凌冬不萎三月三日  
採乾而飲令人不睡明統志茶府縣俱有施肩吾蜀  
茗詞越碗初盛蜀茗新薄雲輕處攪來勻山僧問我  
將何比欲道瓊漿卻畏噴仁懷志小溪二郎土城吼  
灘赤水產茶樹高數尋額徵茶課按五屬惟仁懷產  
茶清明後採葉壓實爲餅一餅厚五六寸長五六尺

廣三四尺重者百斤外織竹筐包之其課本縣輸納  
多販至四川各縣圃中間有種者與湄潭茶同亦不  
能多也又有老鷹茶苦丁茶女兒茶甜茶皆生山谷  
菸姚旅露書烟草名淡巴姑產呂宋蜩庵瑣語烟  
葉出自閩中邊土人寒疾非此不治關外人至以匹  
馬易烟葉一斤崇禎癸未下禁烟之令民間私種者  
間徒尋令犯者斬然不久因邊軍病寒無治遂停是  
禁余兒時尚不識烟爲何物崇禎末徧處栽種雖二  
尺童子莫不食烟矣彭遵泗蜀中菸說蜀多業菸藝  
者歲十月堡土離爲一區一區曰一廂孕種其上廂

各廩茅屋一高五尺寬稱之防霜雪也春二月移樹  
腴田分行通水道以辰漑糞或曰用艾緞溺味更辛  
小滿去近土四圍集令上梢適勃毋分氣夏至前收  
積室中蒙以簞石謂之闕氣味色賴焉七日之後青  
黃間錯出之用踈竹格二一承籍一偃合貫三橫篋  
曝烈日使乾名曰摺葉以草索絡莖糊風簷隙日下  
陰之名曰索葉索醜於摺卷曲而不舒嗜生菸者便  
之產者不名一地大約終歲獲利過稻麥三倍民爭  
趨焉近日河坦山谷低峯高原樹藝遍矣駸駸乎與  
五穀爭生死也按郡人種菸惟販索葉

五倍子

蜀語文蛤卽五倍子生於拂煙樹中有小

細蟲

飛而齧人甚痒名蝮子又黃連樹葉上似

五倍小而花亦有此蟲凡采五倍子宜六月末蟲未  
飛出時取蒸蟲死方澀而可用如遲蟲已出無味不  
中用矣田居蠶室錄其樹土人名夫煙樹葉大似楓  
丹者爲泡夫煙細似椿葉而短者爲鐵夫煙鐵夫煙  
葉大者爲雄小者爲雌雄者不結子泡夫煙子結繁  
蒂上鐵夫煙子結葉背結蒂者形似佛手柑結葉者  
似桃色間紫綠三月發葉子卽生六月摘取用沸水  
微煮其中蟲盡死以供染用其未摘盡者明年自破

蟲飛出一蟲一子一枚蓋數百蟲也種蟲者摘其最老之子懸風處俟葉發時挂之樹一株歲可多得至二斤其蟲不生他樹此樹雖高二三尺歲亦必結數子樹開白花成簇結穗如蜀椴皮及葉亦可染黑

瘦木

桐梓草志邑產乃多年木根得水氣而成者

其文有人物山水各形製器美觀以香桂子爲最卽老鷹茶根也有黃白赤數種白勝黃黃勝赤黑而多水縫癥點者爲下次櫻桃次樟次柟黃棟惟橡瘦無近爲官吏爭購因材殘木山靈亦秘之不易得矣

桃笙

方言簞宋魏之間謂之笙南越志桃枝南人

以爲笙博物志補桃竹之衣如織可爲簞故曰桃笙  
仁懷志蓋椽簞也

葫蘆笙 稗史宋乾德中牂柯人貢詔見詢以地理  
風俗令作本國歌舞一人吹瓢笙名曰水曲卽今蘆  
笙也嗣溪纖志葫蘆笙大如盂長二尺止六管此六  
律初起六同未備之製也以依歌曲韻頗悠揚古穆  
澹宕可於此求元音之始

窰器 田居蠶室錄取甕罍鉢之屬出遵義班水者  
曰班水窰盤椀登壺之屬出綏陽石碓窩者曰石碓  
窰班水器用雜土色暗石碓器用塘泥色白並堅樸



價廉石碓器佳者尤渾雅可愛

羊肝石 播硯記播州城北十里產石居人取爲硯

其石初取時極軟嫩琢之如陶者削泥以意製就火烘之始剛硬色如羊肝故名頗販遠惜不甚下墨

葡萄石 播石記郡產一種石色青絕硬中現蒲桃

子纍纍天然形肖與石阡之葵花石可稱兩奇土人頗以製硯堅滑不宜墨若爲屏案置竹樓梅隴間大稱雅人高致

草類

芝艾鏡面青蒿千里光微焦 陳志竝州縣產

薛 華陽國志暨縣有野生薛可食

虞美人 蓋部方物略記蜀中傳虞美人草予以虞作娛意其草柔纖爲歌氣所動故其葉至小者或動搖美人以爲娛樂耳贊曰翠莖纖柔稚葉相當逼而歌之或合或張蓋州草木記人或歌曲應拍而舞正安志州產按各屬皆有

仙人掌 本草多於石上貼壁而生如人掌故名田居蠶室錄葉厚如掌多刺相接成枝花名玉英色紅黃實似小瓜可食

八月瓜 救荒本草野木瓜一名八月楂又名杵瓜

蔓延生安附草木上葉似黑豆葉微小光澤四五葉攢生一處結瓜如肥阜大味甜

水蠟燭

心齋隨筆叢生池澤中形與燭肖故名李

調元詩竟是天生燭居然照滿川任風吹不熄經雨濕仍然紅影搖波直青藜逐浪圓三條思往事天祿媿當年

燈心草

仁懷志無節可編按各屬皆有種者頗獲

利

清明草

荒年雜詠野有草絨絨白色頂叢開細黃

花味微甘嫩時取和米粉少許作巴食之呼爲軟曲

巴名曰清明草清明時生以後漸老則不可食

竹花菜

荒年雜詠卽蕺草其葉似竹生水旁及陰

濕處人家磨豆漿以菜和煮者多用此凶年食之尤

眾

側耳根

鉅經堂集乾隆庚寅夏二麥無收斗米一

兩餘五月邑令開倉散賑村民皆掘側耳根采夏枯

草澱蕨粉以供朝夕荒年雜詠卽葢菜越王遇荒採

葢是此呼葢爲側者聲之訛

老鴉蒜

齊民要術諍似蒜生水中救荒本草老鴉

蒜生水邊下濕地中其葉直生出土四垂葉狀似蒲

而短背起劍脊其根形如蒜瓣味甜鉏經堂集乾隆  
戊戌大旱米價斗八九錢貧者掘老鴉蒜澱粉以食  
近溪者采苦藕根食之荒年雜詠食者煮熟以籬盛  
之水漂其澀味數十遍然後可食

扁竹根 茂已編草類也多生籬落間根橫生如竹  
節故名扁葉長尺許寬寸餘叢生心抽綠莖開花結  
子大如指此草味辛性沉有積食者掘根和酒服之  
效多服殺人

葶麻 本草綱目葶麻一名毛蕪川黔諸處甚多其  
莖有刺高二三尺葉似花藥或青或紫背紫者入藥

上有毛芒可畏觸人如蜂螫螫蠱杜甫除草詩自注  
云去藜草也墨莊漫錄川陝間有一種惡草土人呼  
爲藜麻又名蝦蟆草蓋部方物贊葉能螫人有花無  
實冒冬弗悴可以祛疾明四川志藜卽蝎子草滇黔  
紀遊土人採以沃湯可療瘋疥蜀語藜麻苗似苧麻  
芒刺螫人痛不可忍又名蠶麻有紅白二種紅者可  
治駒症白者煎湯浸糯米爲粉油煎甚鬆用葉萎猪  
易壯杜子美夔州除草詩曰其毒甚蜂蠆又云芒刺  
在我眼注者以爲山韭字書又以爲菜名大謬

木類

椿楸桑柳冬青榆槐羅漢松 陳志竝州縣木產

楠 蜀都賦榿楠幽藹於谷底又曰交讓所植蓋部  
方物昭記楠蜀地最宜若生童童若幢蓋然枝葉不  
相礙葉美陰人家多植之樹甚端偉葉經歲不凋至  
春陳新相換有花實似母丁香贊曰在上所宜亭擢  
而上枝枝相避葉葉相讓繁陰可庥美幹斯節羣芳  
譜又名交讓木文潞公所謂移植虞芮者以此明統  
志楠木府縣俱有通志楠木產正綏桐三屬近亦難  
得周霖楠木說綏邑諸山舊多楠必兩人引手方合  
抱戶時常見之今則無矣土城山陰有大楠二株蔭

庇數畝纏巖石者數十丈今亦伐其一

樟田居蠶室錄俗名香樟製香者貴其葉桐梓夜

郎站民朝聚廟中有古樟二株相傳漢物也

杉木明統志杉木府縣俱有按桐梓城南三十里

毛坝有杉樹大三十圍

松柏蜀都賦松柏蒨鬱於山峯

桂蜀都賦其樹則有木蘭椹桂劉淵林注椹桂木

桂也

楓香南方草木狀楓香似白楊葉圓而歧分有脂

而香其子大如鴨卵二月發華乃着實八九月熟暴



乾可燒。戊巳編楓香數抱。下雲插漢葉薄。三稜菜大如李竅。穴流白液凝如琥珀。狀有香氣。木性冷濕。誤卧中風。毒卽拳曲不伸。遵郡產白楊楓木。二木最多。土人常材。然木理白。楊輕膩。楓香粗脆。善裂。良楛以此。

白楊 戊巳編樹高數仞。皮色外白內黃。葉圓尖。枝柯柔脆。二三月結線長二三寸。吐白絲如綿。飛散晴空。高下若雪。冬間取其皮。斧細遍撒土中。來年三三月叢生如林。此植白楊之法。

白蠟樹 本草枝葉狀類冬青。四時不凋。蜀人以放

蠟蟲故謂之蠟樹蜀語冬青樹俗名曰蠟樹田居蠶室錄俗名插蠟壓枝卽活山上水邊俱宜放蠟蟲必於此若種一二百株歲獲利與漆等

檉木 四川志古稱蜀木益部方物略記檉蜀所宜民家蒔之不三年材可倍常薪之用疾種亟取里人以爲利杜子美有覓檉栽詩贊曰厥植易安數歲輒林民賴其用實代其薪不棟不梁亦被斧斤按郡人多呼爲畫檉樹

檉櫪

揚雄蜀都賦檉櫪檉櫪

檉柳

本草南齊時益州獻蜀柳條長狀若絲縷卽

此

椶蜀都賦椶枒楔椶劉淵林注椶枒出蜀其皮可作繩履杜甫詩蜀門多椶櫚高者十八九其皮割剝甚雖眾亦易朽蘇軾椶筍詩引椶筍狀如魚剖之得魚子味如苦筍而加甘芳蜀人以饌佛僧甚貴之苟方不知也筍生膚毳中蓋花之方孕者正二月間可剝取過此苦澀不可食矣取之無害於木而宜於食法當蒸熟所施略與筍同蜜煑醋浸可致千

田居蠶室錄多自生栽亦易活其皮用至廣編蓑織蓑最耐久每樹歲割十二皮貴時皮一錢

家有一百株椹歲可減千錢之費其葉亦中飽

黃葛樹

吳省欽黃葛樹考趙光祿文哲黃果

果特葛之轉音自敘州而下樹漸多漸大陰漸廣

經注有黃葛峽宋熊本敗瀘州柯陰夷于黃葛下

子由自江陽見之以爲嘉樹獨怪子瞻致能務觀

公無一語及之按葛產桐梓松坎左右山中

紅豆 益部方物略記花白色實若大紅豆以似得

名葉如冬青蜀人以爲果釘贊曰葉圓以澤素蔕春

數子生莢間纍纍如珠天祿識餘紅豆一名相思子

古詩紅豆生南國春來發幾枝按俗呼娑羅樹皮葉

青黑色近本無枝上團團如蓋四時不凋葉似冬青  
葉所在皆有惟遵義清溪有一株四五年一結子形  
如胡豆絕圓若經十年始結則子逾大竝鮮紅異常  
又沙溪里老木土石上有一株每歲春暮忽一日凋  
葉卽日復生如故今年凋左明年凋右爲異云  
漿梨木 戊巳編樹高丈許叢生白皮黃裏枝節刺  
長一二寸結子夏青冬黑染家染綠布用之按俗多  
呼爲綠條

椽子樹 玉篇椽木名似槐葉黃戊巳編其樹刺如  
鐵釘長大如指傷人至死以爲槌可以禦侮大葉黑

皮結子如亞木理紅色曰紅檬白皮起殼葉尖圓白  
理曰白檬以供薪蒸烈於青桐按此木四月開花攢  
簇堅理異常土人用爲舂杵鋤柄之屬樹之大有至  
數抱者

水紅樹

雲南志謂之水冬瓜大葉粗皮可作柱

黑達樹

陳志黑達樹在治北十里廟山埡昔有異

人識爲神奇按此木幹黑葉長青最堅難長郡中古  
壇舊寺間有之

霸王鞭

田居蠶室錄節節皆如鞭形緣身布刺相

接爲枝幹有高至二丈者護墻落最宜折節插之卽

活

穀

陸璣詩疏穀江南人績其皮以爲布又擣以爲

紙謂之穀皮紙其葉初生可以爲茹西陽雜俎有辦

曰楮無曰構蜀語楮樹曰穀音構其皮可以作紙田

居蠶室錄構花可食皮供造紙蓄穀林者三年一獲

視種田增數倍之利山谷間地宜多種

君遷

蜀都賦平仲君遷司馬公名苑君遷子形如

馬嬭舊

四川志今之造傘者用此作油

闌天竹

夢溪筆談今謂之南天燭南人多植於庭

檻之間莖如胡蘆有節高三四尺葉微似棟而小至

秋則實赤如丹南方至多

刺楸

茂已編樹高者數丈周幹起泡如瘡有刺救

荒本草刺楸樹皮色蒼白上有黃白斑文枝梗間多有刺葉似楸葉而薄味甘

楸木

荒年雜詠俗稱刺老包幹無枝葉莖頭一叢

人取爲茹食之見食物本草

青岡樹

救荒本草青岡樹今處處有之其木大而

結椽斗者爲椽櫟小而不結椽斗者爲青岡其青岡樹枝葉條幹皆類椽櫟但葉色頗青而少花又味苦性平無毒椽子樹本草椽實櫟木子也其殼一名阜



斗所在山谷有之木高二三丈葉似栗葉而大開黃  
花其實橡也有栲櫟自裹其殼卽橡斗也橡實味苦  
澀性微温無毒其殼斗可染皂石岡橡木高丈許葉  
似橡櫟葉極小而薄邊有鋸齒而少花又開黃花結  
實如橡斗極小味澀微苦戊巳編桐木有數種一曰  
青桐平越呼爲麻子樹葉薄而青至秋黃赤色紅皮  
白理皮間如蟲蝕狀子能肥豕郡人斬其大者令發  
芽長二三尺謂之火芽以飼蠶卽山繭也一曰羅鬼  
青桐白皮皮間起皺殼葉如猴栗子長如牛奶一曰  
水青桐黑皮白理青葉不凋一曰紅絀青桐黑皮紅

理葉亦不凋數種性最剛韌薪炭尙之無棟梁之用

竹

筋竹

陳志郡產戴凱之竹譜筋竹長二丈許圍數

寸至堅利南土以爲矛其筍未成竹時堪爲弩弦見徐忠南中奏劉淵林云夷人以史葉竹爲矛卽是筋竹一物而二名者也田居蠶室錄至大者徑四五寸隨地皆宜農家製晒席箕簸之類視斑竹尤堅昇竿必需此人家若歲生水竹三百箇筋竹一百箇斑竹五十箇可售錢十千

斑竹

明統志播州出斑竹陳志郡產

苦竹 陳志郡產戴凱之竹譜苦竹有白有紫而味  
苦田居蠶室錄質脆用者少宜作香燭心惟筍燒食  
絕美

慈竹 王勃慈竹賦序生必向內示不離本修莖巨  
葉攢根沓柢叢之大者或至百千株焉而榮結踰乎  
咫尺好事君子徒爲階庭之玩元稹慈竹詩慈竹不  
外長密比青搖華矛攢有森東玉立無蹉跎纖粉妍  
膩質細瓊交翠柯亭亭霄漢近靄靄雨露多冰碧寒  
夜聳蕭韶風晝羅烟含朧朧影月泛鱗鱗波鸞鳳一  
已顧燕雀永不過蓋部方物略記性叢生根不外引

其密間不容寄生夏秋閱歲餘枝葉乃茂別有數種  
節間容八九寸者曰籠竹一尺者曰苦竹弱質垂地  
者曰鈞絲竹或取節脩膚緻者用爲簞笠贊曰根不  
他引是得慈名中實外堅筍不時萌末或下垂苒弱  
綠縈蜀語竹作箴甚柔者曰慈竹叢生七月出筍甚  
軟可爲繩惟川產最多利用最大別土不產與江東  
慈孝竹不同田居蠶室錄人家宜種一二十窠耕獲  
時用牽用束視他竹尤柔勁兼可護墻落

水竹

陳志郡產田居蠶室錄至大者徑二寸水邊

最宜器用資之最夥近溪農家製水輪輻大者必八

十箇以下輪廣之小者無算焉若不市于人一輪二歲減三千錢

金竹 陳志名荆竹按其竹不大鄉人食其笋利舊時綏陽縣城左右彌望皆金竹林故得金竹里之稱今墾盡惟望艸里金鐘山近日竹笋最盛自昭通笋不殖此專利焉里人每春入山採伐販至重慶諸處今稱爲新笋子廠

桃竹 爾雅桃枝四寸有節蜀都賦靈壽桃枝劉淵林注桃枝竹屬可以爲杖本草蜀中出桃枝竹皮滑而黃犀紋瘦骨竹譜竹心中空惟此竹獨實如木華

陽國志江陽郡有桃枝瑒雄蜀都賦叩節桃枝陳志  
郡產仁懷志如包如織倒植之可爲杖按桐梓婁化  
里產桃竹皮葉全類椶削其皮色純紫根具兩角者  
爲拄杖絕佳杜子美桃竹杖引所謂斬根削皮如紫  
玉出入爪甲鏗有聲者也拔時背攬之忌出聲否則  
無角

紫竹

益部方物略記蜀諸山中尤多園池亦種爲

玩然生二年色乃變贊曰竹生二歲色乃變紫伐幹  
以用西南之美陳志郡產田居蠶室錄堅勒似筋竹  
以爲几案杖架諸具甚雅潔雜作蓬壁羅文可觀俗

呼黑竹

方竹

陳志郡產益部方物贊竹筍皆圓此獨方形

厚倍於竅細節圓稜眾方寡取貴

缺

平竹

綏陽志巨產

刺竹

綏陽志巨產按各屬皆有

鳳尾竹

陳志郡產

觀音竹

田居蠶室錄葉細密無高大者種者僅供

玩八絃譚史觀音竹色黑如鐵出占城

花類

芍藥芙蓉海棠薔薇玉簪梅絳桃碧桃木樨梔子

紅白石榴繡球

陳志並州縣產

瑞香夢花木筆紫荊紫薇金錢剪春羅秋海棠滴滴  
金雞冠西番菊水仙鳳仙金盞

綏陽志邑產按各  
屬皆有

玫瑰木香石竹

正安志州產按各屬皆有

蘭

仁懷志山谷中所在皆是田居蠶室錄山中多

有之佳者可次是蘭其不香者曰木蘭一種不沾泥

土根自盤結懸之自開一枝發十餘朵曰弔蘭不香

菊

牧監間談蜀人多種菊以苗可入菜花可入藥

園圃悉植之郊野人多採野菊供藥肆頗有大誤真



菊延齡野菊瀉人仁懷志巖厂間皆菊可駐顏茲地  
人不識采深爲可惜按植者多至百種因形製名不  
勝錄

牡丹

〔本草〕牡丹生巴郡山谷合州者佳

茉莉

〔通志〕南方草木狀稱其芳香酷烈嶺外海濱

恆多今黔省亦栽隔年則不花獨仁懷土地爲宜

西府海棠

〔仁懷志〕西府蜀府也云分自蜀王府中

又有鐵幹海棠

茶蘼

〔益部方物略記〕蜀茶蘼多白黃者時時有之

但香減於白花贊曰人情尚奇賤白貴黃厥英略同

實寡於香蘇轍次韵詠醑醑蜀中醑醑生如積開落  
春風山寂寂已憐正發香曖曖猶愛未開光的皦

伊蘭

楊慎伊蘭賦序江陽有花名賽蘭香不足於

艷而有餘於香戴之髮紒經旬猶馨意古者紉佩之  
用頰浴之具必此物也西域有伊蘭以爲佛供卽此  
漢書所謂伊蒲之供也羣芳譜伊蘭出蜀中名賽蘭  
樹如茉莉花小如金粟香特馥烈戴之香聞十步經  
日不散

紫繡毬

巖棲幽事蜀有紫繡毬

映山紅

本草杜鵑花一名映山紅草花譜杜鵑花

出蜀中者佳謂之川鵲花內十數層色紅甚

山茶 葯圃同春蜀茶紅白二色清而喜腴秋時用  
烏豆水灌之其花益妍羣芳譜山茶以寶珠爲佳蜀  
茶更甚

蜀葵 爾雅菁戎葵注今蜀葵也似葵花如木槿華  
顏延之蜀葵贊并維降精岷絡升靈物微氣麗卉草  
之英渝艷眾葩冠冕羣英類麻能直方葵不傾

天葵 峒嶼神書紫背天葵出蜀中靈草也生於水  
際取自然汁煮水則堅

秋葵 本草作黃蜀葵寇宗奭云與蜀葵別種非蜀

葵中黃者說文黃葵常傾葉向日不令照其根按此  
卽郡人所謂向日葵蘇軾題趙昌畫黃葵詩低昂黃  
金杯照耀初日光檀心自成暈翠葉森有芒是此

金梅

雲南志花開黃色與梅同時故名又以垂條

似柳一名迎春柳按俗名迎春花

石蟬花

益部方物略記石蟬花始生其條森擢長

二三尺葉如昌蒲紫萼五出與蟬甚類綠黃相厠蜀  
人因名之又白者號玉蟬花贊曰有茗頽然有萼敷  
然取其肖象莫類於蟬

紅蕉花

益部方物略記於芭蕉蓋自一種葉小其

花鮮明可喜蜀人語深紅者謂之蕉紅蓋倣其殷麗云贊曰蕉無中幹花產葉間綠葉外敷絳質凝殷

月季花

益部方物略記此花卽東方所謂四季花

者翠蔓紅蔕蜀少霜雪此花得終歲一十二月月輒

一開贊曰花宜四時月一披秀寒暑不改似固常守

錦帶花

益部方物略記蜀山處處有長蔓柔纖花

萼側如藻帶然因象作名花開者形似飛鳥故里

人亦號曰鬢邊嬌贊曰苒苒其條若不自持綠葉丹

英蔓衍紛垂杜詩注錦帶花一名海仙花一名文官

花有花如錦遂名錦帶條如郁李春來方開紅白二

色

蝎子花

東還紀程黔省山谷中多蝎子花

長樂花

傅元紫華賦序紫華一名長樂生於蜀其

東界特饒中國奇而種之余嘉其花純耐久可歷冬而服故與友生各爲之賦蘇頌長樂花賦莖丹外而縞中葉縹分以紅貫綴綠穎之重疊素紫蕤之爛漫蓋部談資長樂枝葉皆如虎耳草秋後叢生盆盎間開紫色小花冬末轉盛鮮麗可愛居人獻歲以此爲餽名曰時花

七寶花

蓋部方物略記條葉大抵玉蟬花類也其

生叢蔚花紫色絳苞贊曰擢穎挺挺盛夏則榮丹紫  
含英以寶見名

旌節花

蓋部方物略記條條華碧皆層層而擢正

類使所持節然故以名見蓋州圖經贊曰擢條亭亭  
層層紫丹狀若使節方圖寶刊

朝日蓮

蓋部方物略記花色或黃或白葉浮水上

翠厚而澤形如菱花差大開則隨日所在日入輒斂  
而藏於葉下若葵藿傾太陽之狀贊曰素花碧葉浮  
秀波面日中則向日入還斂按郡人謂之子午蓮

打碗花

救荒本草蒿子根俗名打碗花一名兔兒

苗一名狗兒秧幽薊間謂之燕蓄根千葉者呼爲纏  
枝牡丹亦名穠花生平澤中今處處有之延蔓而生  
葉似山藥葉而狹小開花狀似牽牛花微短而圓粉  
紅色其根甚多大者如小筋粗長一二尺色白味甘  
性溫

鐵線蓮 田居蠶室錄蔓生花大徑寸餘白瓣瓣上  
布青綠纓一圍中心突出末橫起蕊如十字尖綴黃  
粉其心有汁最甘可食花隨日而轉朝開暮合布落  
穿籬清雅可玩

陽雀花

仁懷志杜鵑鳴時卽開如萱花味甘美可



食按此花枝似枸杞葉間有小刺花絕肖蠶豆花色黃一葉一花金光成串謂似萱誤也

臘脂 史記貨殖傳巴蜀亦沃野地饒卮薑注卮烟支也紫赤色

鴛鴦草 益部方物略記春葉晚生其稚蘆在葉中兩兩相向如飛鳥對翔贊曰翠蘆對生甚以匹鳥逼而觀之勢若偕矯

木蓮 白居易木蓮樹詩序生巴峽山谷間巴民亦呼爲黃心樹大者高五丈涉冬不凋身如青楊有白文葉如桂厚大無脊花如蓮香色艷膩皆同獨房蕊

有異四月初始開自開迨謝僅二十日益部方物贊  
葩秀木顛狀若芙蓉不實而榮馥馥其敷接婁山關  
木蓮千年來樹道光癸巳爲風折毀

天花 滇黔紀遊天花產峭壁間大如車輪色赤如  
火光映兩山皆如渥丹四月以後卽謝落

龍爪花 香祖筆記蜀有龍爪花色殷紅秋日開林  
薄間甚艷游宦紀聞載永福古識云龍爪花紅狀元  
西東按土人名老鴉花其根卽老鴉蒜

悶頭花 東還紀程黔山中多悶頭花按花莖類百  
合高或丈許花似玉蘭瓣絕大遠觀絕可愛嗅之則

頭爲悶暈故名

鵝毛玉鳳花

蓋部方物贊本至卑纖蓬如釵股秋

開不蔕而鬚狀似禽故曰鳳色白故曰玉以其分至  
輕故曰鵝毛贊曰華而無采狀類翔鳳么質毛輕翮  
欲飛動

金燈花

薛濤金燈花詩闌邊不見蘘蘘葉砌下惟

翻艷艷藜細視欲將何物比曉霞初疊赤城宮接俗  
名燈盞花

藥類

草烏何首烏車前枸杞益母草黃柏白芷香附當歸

金銀花石菖蒲天花粉威靈仙茵陳黃芩黃精鹿茸  
荆芥香薷苦參牽牛蒼朮天門冬麥門冬蛇蛻山藥  
茴香扁豆常山虎脛骨半夏杜仲山梔遠志瓜蒌

陳志皆州縣藥產

牛膝黃精天麻續斷石斛百合升麻白芨 綏陽志  
縣產按各屬皆有

五味子紫蘇薏苡山茨菰稀薺厚朴枳殼木通瓜萋  
桔梗陳皮青皮蒼耳 正安志州產按各屬皆有

前胡 綏陽志縣產按各屬皆有惟產遵義北雞喉  
關者心如菊花他處不及數里外產者晒之關上卽

有菊花心川廣人歲於關上收買

五加皮

蜀語五加皮謂之白刺顛或曰白刺葉作

酒麩藥譙周巴蜀異物志名文章草蜀中葉三歧蘇

州葉五歧蜀異物贊文章作酒能成其味

當歸

本草今川蜀皆以畦種尤肥好多脂

大黃

本草蜀川錦紋者佳又蜀大黃及作繫片如

牛舌形謂之牛舌大黃

附子

揚雄蜀都賦薑梔附子

透山根

岫嶠神書透山根生蜀中山山谷草類蘼蕪

可以點鐵成金

黃連 通志黃連府境及各屬俱出仁懷志根卽生葉長三四寸以根爲幹葉數瓣深碧色茲土所產頗佳按遵義北鄉有地名黃連堡產者尤多

仙茅

通志仙茅出府南境

巴豆

華陽國志江陽郡有巴菽蜀都賦其中則有

巴菽巴戟

海芋

益部方物略記海芋生不高四五尺葉似芋

而有幹根皮不可食方家號隔河仙云可用變金或云能止瘧贊曰木幹芋葉擁腫盤戾農經不載可用治厲本草綱目海芋一名觀音蓮一名羞天艸一名

天荷生蜀中今亦處處有之

鈎藤

田居蠶室錄郡產鈎藤以色紅者良遵義大

溪里蘇箭棚所產爲勝

倒築傘

田居蠶室錄枝葉結子與薔挾蔗絕似其

生也枝末挂地卽生根復起再長挂地復然大者竟不知本末所在子可食根可入藥

紫草

田居蠶室錄生山中花葉似胡麻惟幹圓結

子如蘇麻子大根紫紅色春生秋後葉落幹枯其根始紅掘之供用

羽類

鷹鵠鳩鳧鷺鷥鷺燕雀鴛鴦烏鴉鵲伯勞鷓鴣 陳志

竝州縣禽產

畫眉啄木鵲鸚鵡 綏陽志 邑產 按各屬皆有

鵲隼鷓鴣黃雀鵠鵲鵲 正安志 州產 按各屬皆有

白鵞 陳志 郡產 仁懷志 其文斑斑然修尾

鶴鷄 陳志 郡產 仁懷志 縣特盛

黃鸝 通志 府屬俱有

畫眉 通志 府屬皆有

杜鵑 華陽風俗錄 大如鵲而羽烏聲哀而吻有血

春至則鳴 本草 杜鵑小如鶴呼鳴不已 蜀人見鵲而



思杜宇故名金川瑣記綬靖屬之遜克宗地名有一種雀形如斑鳩長尾常自呼曰貴貴陽晝夜不絕聲土人目爲陽雀云係雀王深栖叢莽不喜飛翔日俟羣雀俱盡乃此雀非蟲不食夜間與叫月子規空山答響倘亦開明魂化耶按本草綱目李時珍引諺云陽雀叫鷓鴣央鳩音桂卽楚詞之鷓鴣漢書之鷓鴣今郡人呼貴貴陽者字異實聲同也瑣記謂與子規別一鳥非是

吐綬鳥 西陽雜俎大如鳩鴿羽色多黑雜以黃白頭頰似雉有時吐物長數寸尺彩彪炳形色類綬因

名爲吐綬鳥又食必蓄嗉臆前大如斗慮觸其嗉行  
每遠草木故一名避株鳥太平寰宇記夔州產大如  
翟而五色可愛天和淑景卽吐綬長一尺許須臾還  
吞之按蔡寬夫詩話又名真珠雞今桐梓西北山菁  
中有之羽錯白圓點嗉藏肉綬闊數寸紅碧相間遇  
晴則頂上先出肉角二寸許然後徐舒其綬其鳴如  
人呻吟

百舌鳥 蓋部方物略記出蜀中山谷間毛彩翠碧  
蜀人多畜之一云翠碧鳥善效他禽語凡數十種非  
東方所謂反舌無聲者往往亦矜鬥至死不解然捕

者告罕故惜之不使極其擊云贊曰綠衣紺尾一啼百轉可樊而畜爲世嘉玩

鷓鴣

揚雄蜀都賦裏鷓鴣鷺東齋記事蜀之魚家

養鷓鴣

十數日得魚可數十斤以繩約其吭才通小

魚大魚則不可食時呼而取出之乃復遣去其馴狎指顧如人意有得魚而不以歸者則狎羣者啄而使歸比之放鷹鷂無馳走之勞得利又差厚緡素雜記峽中人謂鷓鴣爲烏鬼養之取魚爲業四川志卽杜詩所謂烏鬼也

錦雞

蜀都賦蝓煖山棲劉淵林注蝓煖鳥名如今

之所謂山雞雄色斑雌色黑出巴東中華古今注遜  
周禮曰文翰若采惟周成王時蜀人獻也陳志州  
縣竝產仁懷志錦雞項一圍五色相雜尾如孔雀欄  
朗景彰

箐雞 池北偶談箐雞產水西長尾白羽羽之周遭  
黑文緣之如淡墨所畫或畜之見人輒避去終不馴  
擾按此郡縣皆有伏朔洞中其聲如人啼

竹雞 陳志郡產按竹雞短尾褐羽飛不能高常羣  
遊竹間鳴聲不已捕者聚葉爲埒埒間開多門以繩  
套置門口急逐之則受繫矣或不設埒套被逐急則

入頭葉間俗謂作事不顧後者爲竹雞形飼之辟白  
蟻

桐花鳳 蓋部方物略記二月桐花始開是鳥翱翔  
其間丹碧成文纖皆珍尾仰露以飲至花落輒去蜀  
人珍之號爲鳳或爲人捕置樊間飲以蜜漿餽以炊  
粟可以閱歲蜀士以繪扇唐李衛公嘗爲賦贊曰金  
花之露俗曰鳳類綠羽纖爪藻背翠尾花落則隱以  
是見貴按此鳥桐梓有之

護花鳥 蓋部方物畧記至春則鳴其音若云無偷  
花果髮鬚人言云贊曰茜首黑裳黃駁其羽厥鳴嚶

嚶若禁若護名而不情盜者猶懼按邵人呼爲媯早  
苞穀或呼早早布穀各以音相似名之實一鳥也  
點燈捉蛸蝨 蜀都碎事春時每至夜半有鳥鳴其  
聲云點燈捉蛸蝨土人云昔有夫婦爲蚤所苦夜起  
點燈時以雨屋頽壓斃遂化爲鳥飛必匹偶鳴必相  
應亦可異也

山鳳皇 心齋隨筆大如雀色白長尾飛必雙不常  
見出遵義天旺里十二茅坡諸山

翡翠 戊巳編郡屬皆有土人呼爲青水翠捕得者  
販他省製飾最良

鐵稜甲 仁懷志身小如鷹方能捕鷓鴣軒雜著此  
鳥大如畫眉尾岐如魚尾觜距如鐵身黑色故名短  
小精悍鷹鷂之所畏也嘗坐庭中鷹下攫雞雛去此  
鳥二疾去如風撲鷹左右鷹毛散落雛墮地復生  
山胡 蘇軾山胡詩自註善鳴出黔中蘇轍次韻山  
胡詩山胡擁蒼鬣兩耳白茸茸野樹啼終日黔山深  
幾重啄溪探細石噪虎上孤峰被執應多恨筠籠僅  
不容按山胡形似畫眉灰褐色頰黑而白耳鳴聲自  
一字至五字脆婉可聽

毛類

虎 居易錄李刑部言遵義府多虎有四種斑虎與  
常虎文質同黃毛虎無黑文尤獍惡鬣衣虎毛長被  
體如鬣衣狀刀箭不能入而朱虎最獍嘗聞於綏陽  
縣村落間二日齧三十七人捕之則咆哮入山卒不  
能致其毛殷紅如猩猩氈色常璩巴志秦昭襄王時  
白虎爲害自秦蜀巴漢患之秦王乃重募國中有能  
殺虎者邑萬家金帛稱之於是夷胸忍廖仲藥何射  
虎秦精等乃作白竹弩於高樓上射虎中頭三節白  
虎常從羣虎瞋恚盡搏殺羣虎大响而死秦王嘉之  
僧徹字一庵集有康熙乙丑聞虎屢入綏陽城詩仁



懷志縣有虎匠邑令與之券令尋虎以白竹弩濡以藥射殺之覺軒雜著俗言三虎一豹常疑之近地線雞水有虎乳子山洞中其母覓食村爲不寧村人乘母出至洞縛二子置樹顛其母至咆吼掘樹以此知虎生子無多大約每乳一虎一豹云趙毓駒殺虎記乾隆二十年虎夜入桐梓汎官署銜千總某妻去某率兵民數百人遍索城中次日得之後山已食盡惟餘一足眾官因募獵戶捕虎時一囚在禁聞之告曰若宥我虎不難捕也遂縱之囚卽召其徒凡數輩持殺虎具來尋數日得其穴虎見之驚走逐至木磔虎

走負嶠待囚囚以傘進虎躍起銜之機發口不能張  
翕囚牽以行其徒有捉虎耳者有擊虎尾者入城獻  
俘千總寸磔別有二虎數日中亦爲囚殺

山水豹 居易錄李刑部又云遵義有山水豹皮有  
斑文自然成山水形宛如圖畫

松花豹 仁懷物產記友人劉君得一皮其章如鼠  
而狀似豹差小名曰松花豹蓋爾雅豹鼠也

水鹿 居易錄章邱胡武舉隨其兄任真安州州遵  
義屬也云鹿有三四種最大者曰水獐狀如水牛重  
五百斤

犀 揚雄蜀都賦馬犀象麋太平寰宇記南川貢犀  
角明統志犀角綏陽縣出陳志按舊志廢綏陽縣出  
犀角考廢綏陽縣在真州長官司東南二百五十里  
在隋屬思州宋大觀置承州宣和初廢割隸珍州後  
廢則廢綏陽實思州地今綏陽無產者

象 蜀都賦犀象競馳太平寰宇記南州濠州貢象  
牙

熊 明統志府縣俱有仁懷志熊於山中必有停處  
謂之熊館

獠 揚雄蜀都賦獠胡雖獾狻蝨獾獠明統志府縣

俱有

麋山羊野豬 陳志並州縣獸產

鹿 仁懷志如鹿而小足亦不同

狐 陳志郡產仁懷志有九節狐其尾有節腎卽麝

也

獾 仁懷志狀如犬皮可寢處

萬萬 仁懷物產記童子告余茲地有野人至人家

輒蹲雞埽上暮與人宿嗜食人指蓋萬萬也

獾 仁懷物產記輿人指而告余曰茲嘗出獸黑章

白臆能食鐵非卽山海之獾乎

竹鼯

陳志郡產仁懷志其皮如貂

豺

陳志豺狼郡產田居蠶室錄俗呼豺狗前二十

年未聞有此數年間歲日增多初時聞間食犬羊豕  
漸及幼孩漸及老壯近無日不聞食人且晝或入水  
田啖鵝鴨夜或破雞棲盡其羣各城城樓之上公署  
左右晝卧夜嗥如遊無人之境亦極奇矣此物胆大  
多智瘠而有力善走獵戶以無肉皮亦無用見則縱  
之村民隻身見者則不敢逐逐亦須臾不知去處里  
中夜行必相戒攜器刃或遇三五成羣東西呼嘯其  
聲如鬼爲之胆裂山埋路瑾其淺者每爲所掘食爲

虐極此苟長吏懸賞以鼓獵戶令民以竭作之法圍山搜箐以時行之雖不能無遺育庶有豸乎

鱗介類

鯉魴鱮鱔鰕陳志並州縣鱗產

鯖鱸鼈吹沙魚赤尾白小綏陽志邑產按各屬皆有

鮎青魚白鮓正安志州產按各屬皆有

文龜太平寰宇記溱州貢文龜明統志文龜廢溱州出陳志按文龜斑布丹砂一統志誤載廢溱州出

歷查並無

鯉魚通志府境所產不大漁人偶得之亦如都勻  
鱖魚以通省所無而珍按綏陽冠子山下龍泉內產  
此俗呼油黃魚色黃大者十餘斤春時出遊泉外頃  
仍入泉不至溪釣者不能得惟潛網之每得一二味  
絕美

嘉魚太平寰宇記細鱗如鱖蜀人謂之拙魚蜀都  
山中處處有之每歲二三月隨水出穴八九月逆水  
入穴

石斑魚墨客揮犀南方溪澗中有魚生石上號石  
斑魚作鮓甚美至春則有毒不可食按今溪中石斑

魚黃腹黑背無鱗腹平如掌長不過二三寸附石而行五六月捕魚者照以火於石上捉之

桃花魚

采熊文稷忠州桃花魚記是魚形出五色

近淡墨蕊其足也生於社日前後桃花開時始逐隊

而出入夏日卽化去土人以形似桃花故名不特此

地始有蜀都碎事梁山縣有桃花洞口小溪中出

魚曰冰雪魚每當桃花勝開之時其魚頭上有紅骨

一片狀類花瓣桃花落盡魚之頭骨亦無矣按桐梓

北新站溪中出之頭沁紅形如桃花瓣

哇哇魚

桐梓志邑產爾雅鯢大者謂之鰕注今鯢



魚似鮎四腳前似獼猴後似狗聲如小兒啼大者長八九尺別名鰕舊四川志鯪卽鯪魚大首長尾善緣木天旱輒含水上山以草覆身張口露水鳥來飲水因吸食之性有毒按嘉慶中桐梓水漲有一媪至魁巖民家乞食民家食米葷飯與一缶媪緣河去午後此民捕得一哇哇魚甚巨剖其腹前飯在焉大駭棄之

龜鱗螺蚌穿山甲 陳志並州縣介產

石龜 鹿遊詩自註產桐梓水銀夜郎諸溪剖石出之形與龜絕肖潘元音石龜記南平之南有溪曰夜

郎東行四十里有地曰安穩壩地接黔壤山欽寄產  
石龜狀類龜形口鼻爪甲畢具胎大石中居民識之  
每雨霽後於崩巖墜穴間剖之得小卵石光圓密栗  
其色黃其燥濕協陰陽俯仰皆肖天然可觀土人云  
養之期年則有活致置水盆中曉則復聚一處三周  
則目擊其行走七載則化活龜去矣其養之之法晝  
以米夜以水或曰石燕也天將雨則舞今試之水中  
猶能自吐沫珠云

黃連蛇 鄭仲夔冷賞凡產黃連之地必有小蛇尺  
許盤旋其中觸之傷人必先去小蛇然後恣採按此

蛇色黃惟食黃連葉上露不他往也

蟒 夢餘筆談七八歲時從同館生往三台山掘野  
薯山半田阡有一井不甚深廣時循井過赤日行空  
禾苗茂鬱忽起黑雲一朵生曰雨且至亟偕下山突  
見一物吸於井首黑毛絨絨戴一角高三四寸有赤  
冠長二三尺高寸餘眼如銅鈴身徑尺許從首以下  
如丈許爛木餘爲禾蔽不知長竟相駭曰龍也俱急  
走頃雷電大雨平地水湧尺餘明日耕人跡所過處  
禾空一道競言龍行不知實蟒也

棒蛇 鋒尖蛇 田居蠶室錄山中產一種棒蛇長者

二尺形若竹棒兩頭如一不知其首尾行則一頭觸地一頭翻起互翻互觸而行最速一種名鏹口尖長似常蛇惟兩頭俱尖亦不知其首尾俱能傷人二種是古之言蛇所不知者

蟲類

蜂蝶蜻蜒蚋螳螂蜈蚣

陳志並州縣蟲產

蠓螭本草經一名土蜂生熊耳山谷及牂柯或人

物間

螞蟻舊通志元馬士啟者許昌人仕黔爲順元府

經歷嘗奉遣抵驛站日已暮站吏告曰今夕馬蚌上

岸麻色須暫停以避之詰其故閉目搖手不敢言馮怒趣馬行數十里至溪畔忽見一物如屋烏刺赤下馬伏泣若訴狀再詰之仍閉目搖手不答馮於是下馬祝之曰某竊祿於此苟天命合盡爾其啖之否則容我行祝畢卽轉入溪中腥風毒霧尙觸人口鼻乃各上馬比曙抵前站吏驚曰是何麻色胆乃若是馮問此何物始敢言曰螞蟻精也馮後官禮部尙書烏刺赤站之牧馬者

珍珠蟲 田居蠶室錄生林箐中長寸餘色白人觸之卽拳若珠一顆滾入草間故名

土鼈 生舊宅及朽木中形如鼠婦團而赤色伏  
內斷而續之仍活也能治血證折傷

筆袋 長不及寸色赤傍樹根吐絲結一囊上系於  
樹半在土中身伏囊底飛蟲粘囊上卽升而食之出  
囊卽不能動畜蠶眉者竟以供飼謂能壯其鳥

水端公 形如鼈背皆斑點大者如指大喜浮水面  
足出背兩弦髻峭出水如斜植母字驚之一縱下可  
二三尺旋仍縱起每誤縱上岸行或跳皆可返池中  
生此可娛靜觀以其善跳舞盤折故得端公名

秧醫 生田中大如指黑殼背有短針插秧者久勞

血縋於手致臂腫覓取以其針針之卽愈仍放之去  
偷油婆 生廚竈間身翼皆赤黑速走羣燕遊食閣  
內渾身脂濡濡驅去旋視之又脣入膏缸矣然毒蟲  
避之

春確婆 大如小豆八足且長有跪常聚門壁隱處  
小兒斷其足輒掣不已如春然因名

魚蝨 生魚翅下或腹中絕腥治翻胃有神驗魚生  
此卽病不能長

蛇皮蜂 形如長蜂微小結窠樹枝上連連而下  
懸長者至尺許孔皆橫向若垂鞭爆故名並同上

飲食類

火米 蜀語熟穀曰火穀舂成米曰火米用秔稻水  
煮滾佳火停鍋中一夜次早漉去水又用火蒸上氣  
晒乾爲米每斗穀多得米一升每升多食一人疑是  
仙傳如稷稻依此法作炒米甚鬆李德裕詩曰五月  
畚田收火米異物志曰交趾夏月稻熟曰火米皆以  
火米爲生成非也

茅苔酒 田居蠶室錄仁懷城西茅苔村製酒黔省  
稱第一其料純用高粱者上用雜糧者次之製法煮  
料和麴卽納地窖中彌月出窖煏之其麴用小麥謂



之白水麴黔人又通稱大麴酒一曰茅苔燒仁懷地  
瘠民貧茅苔燒房不下二十家所費山糧不下二萬  
石青黃不接之時米價昂貴民困於食職此故也

啣酒

蜀語箛酒亦曰啣麻酒以稗米或麥粟梁黍

釀成酒熟時以滾湯灌壘中用細竹箛通節入壘內  
啣飲之啣去一杯別取一杯熬湯添之壘口是水酒  
不上淳至味淡乃止華陽國志郫縣有一井井邊有  
竹截竹爲箛以吸井水水變爲酒他竹則否竹盡則  
井亦凡水矣杜子美曰酒憶郫箛不用沽至唐時已  
無故曰憶井水爲酒故不用沽今之啣酒蓋仿佛郫

筍遺意嗣溪纖志啞酒一名釣藤酒以米雜草子爲之以火釀成不芻不酢以藤汲取多有以鼻飲者謂由鼻入喉更有異趣滇行紀程苗人以蘆管吸酒飲之謂之竿兒酒楊慎飲啞酒詩醞入煙霞品功隨麩藥高秋筐收椽栗春瓮發蒲桃旅集三更興賓酬百拜勞苦無多酌我一吸已陶陶

銀絲麩 心齋隨筆綏陽製水引極細者曰銀絲麩其城中所製尤佳商人多販至湖南北四川市者珍之

烏江麩

蘆洲偶筆烏江關岸上一民家製麩博如

大韭葉味絕佳兩岸多有學製者皆不及也以地稱  
烏江麪市者以爲珍餽云

饗巴

蜀語蒸糯米揉爲餅曰饗巴卽禮記粉粢注

云以豆爲粉糝饗餅上也凡餅塊爲巴蜀之通稱

茶食

田居蠶室錄人家所作食品稱茶食名物極

多其蒸糯米以木規團之厚半寸許上點以五色曰

米花其用糯米粉擀成片煮之復和粉攪而擀之穿

剪成各形曰米葉其用糯米粉漿灑之微熱釜中令

層起中空如網如羅紋亦點以五色曰米線三者皆

以豨膏炙之味鬆脆其用糯米漬至一月聞之氣絕

臭探之米只存心漉之盛以木盆杵爛以箸挑成條  
曝乾用沙燻之曰米纈其切爲顆燻之如鵝卵大者  
曰米果皆色微黃味甘富家婚事以諸物爲尙親戚  
多先製此餽之惟米纈不常作以其太暴殄也

搗茶

薛能詩野色生肥芋鄉儀搗散茶甕牖間評

余生漢東最喜啜茶間時嘗過一二北人知余喜  
啜此則往往煮以相餉未嘗不欣然也其法以茶芽  
盞許入少脂麻沙盆中爛研量水多少煮之其味極  
甘腴可愛蘇東坡詩云柘羅銅碾棄不用脂麻白土  
須盆研者是矣而東坡詩又云前人初用茗飲時煮

之無問葉與骨茶錄中亦載茶古不聞食晉以降吳人採葉煮之號茗粥則知啣茶者自晉蓋有之矣非復今之人始食也按黃山谷詩雞蘇胡麻雷渴羌不應亂我官焙香所雞蘇胡麻亦指啣茶可爲一證今郡人食插茶者雞蘇花椒雞蘇脂麻研之間加胡桃肉火麻亦可插茶時盛用罌粟種者非製此無所用自鴉片禁行茶庫亦稍衰矣